

ԻՐԱՎԻՃԱԿԸ ՀՅՈՒՍԻՍԱՅԻՆ ԿՈՎԿԱՍՈՒՄ. ՄԱՐՏԱՎԱՐԱԿԱՆ ԵՎ ՌԱԶՄԱՎԱՐԱԿԱՆ ՀԵՏԵՎՈՒԹՅՈՒՆՆԵՐ

Վերջին շուրջ կես տարվա ընթացքում կովկասյան տարածաշրջանում տեղի ունեցող զարգացումների արդյունքում ստեղծվել է նոր բնույթի մի իրավիճակ: Այն, սակայն, իրենից չի ներկայացնում ուժերի վերջնական փոխդասավորվածություն (անգամ՝ կարճաժամկետ կտրվածքով), այլ՝ համակարգային առումով հանդիսանում է նոր (թերևս՝ աննախադեպ) փոխդասավորվածության սկիզբ:

Երկրորդ կարևոր դիտարկումը. Խորհրդային Միության փլուզումից հետո հերթական անգամ անգամ գործընթացները կովկասյան տարածաշրջանի հյուսիսային և հարավային հատվածներում օրգանական առումով էապես փոխկապակցվեցին և, սկսած օպերատիվ գործողություններից մինչև աշխարհաքաղաքական շարժերը, կովկասյան երկու հատվածներն այլևս տրամաբանորեն փոխլրացնում են միմյանց:

Հյուսիսային Կովկասի «ակտիվացումը»

Կովկասյան տարածաշրջանում նոր բնույթի գործընթացը, որի սկիզբը նշանավորվեց 2003թ. նոյեմբերին վրացական «վարդերի հեղափոխությամբ», տալիս էր բոլոր հիմքերը պնդելու, թե հետագա գործողությունների (համաձայն գործողությունների զարգացման «դասական սխեմայի»¹) «ակտիվ դաշտը» հանդիսանալու է Հարավային Կովկասը: Սակայն գերազանցապես նույն Հարավային Կովկասում ռուսական ռեսուրսների սակավության² պատճառով «ակտիվացումը» տեղափոխվեց Հյուսիսային Կովկաս:

Ներկայում Հյուսիսային Կովկասում ընթացող զարգացումներն են, փաստորեն, հանդիսանում կովկասյան փոխդասավորվածության որոշիչ գործոններ:

¹ Status quo-ի խախտումը մեկ ուղղությամբ առաջացնում է հակազդեցություն հակառակ ուղղությամբ: Ընդ որում, քանի որ գործողությունների տրամաբանությունը ի սկզբանե սահմանափակված է արդեն իսկ գոյություն ունեցող համակարգով, ապա աշխարհաքաղաքական տեսանկյունից զարգացումները պարզապես չեն կարող դուրս գալ այդ համակարգի ներքո գտնվող տարածաշրջանից, քանի որ տվյալ տարածաշրջանից դուրս գործում է այլ համակարգ: Բացառություն են կազմում *հակահամակարգային* զարգացումները, որոնք, խախտելով առկա կարգերը, կարող են խախտել նաև հաստատված աշխարհաքաղաքական փոխդասավորվածությունը (օրինակ՝ «Մեծ Մերձավոր Արևելք» նախագիծը):

² Աջարական և հարավօսական ճգնաժամերը՝ որպես ցուցիչ:

«Ակտիվացման» սկիզբը թվագրվում է սույն թվականի (ս.թ.) մայիսի 9-ով¹, երբ Հայրենական մեծ պատերազմում տարած հաղթանակի կապակցությամբ Գրոզնիի «Դինամո» մարզադաշտում անցկացվող տոնախմբությունների ժամանակ *VIP*- նաստելատեղերի տակ տեղադրված ռումբի պայթյունից զոհվեց Չեչնիայի նախագահ Ահմադ Կադիրովը:

Ս.թ. հունիսի 21-ին, տեղի ժամանակով 22:00-ին մի քանի հարյուր (ըստ տարբեր գնահատականների՝ շուրջ 300) գրոհայիններ, որոնց միջուկը կազմում էին ինգուշները, բաժանված լինելով մանր ջոկատների, գրոհեցին Ինգուշիայի Նազրան և Կարաբուլակ քաղաքների մոտ գտնվող պահակակետերի վրա և զինաթափելով ու գնդակահարելով այնտեղ գտնվող ՄՀՕՁ-ականներին (Միլիցիայի հատուկ օպերատիվ ջոկատ, ռուս.՝ *ОМОН, Отряд милиции оперативного назначения*)՝ հարձակվեցին նույն Նազրան² և Կարաբուլակ քաղաքների վրա³: Նազրանում հարձակման են ենթարկվել Ինգուշիայի ներքին գործերի նախարարության⁴, Անվտանգության դաշնային ծառայության (ՄԴՏ, ռուս.՝ *ФСБ, Федеральная служба безопасности*) և քննչական գլխավոր մեկուսարանի (որտեղ բանտարկված են մի քանի տասնյակ գրոհայիններ և նրանց կողմնակիցներ) շենքերը, Կարաբուլակում՝ ոստիկանության քաղաքային բաժանմունքը, ՄՀՕՁ-ի շտաբը և Ռուսաստանի Դաշնության ներքին գործերի գորակայանը: Բացի այդ, նույն Կարաբուլակում գրավվել է մեկ զինապահեստ⁵, որտեղից հարձակվողները *КамАЗ* տեսակի երկու բեռնատարներով զենք են տարել:

Տագնապով ոտքի բարձրացված գորքերը նետվել են Մագաս՝ պահպանելու նախագահ Ջյազիկովի անվտանգությունը, ուստի Նազրան և Կարաբուլակ քաղաքները հունիսի 21-ի լույս 22-ի ողջ գիշերվա ընթացքում գտնվել են գրոհայինների տրամադրության ներքո, որոնք այդ քաղաքներում անհապաղ անցկացրել են «գտնումներ»՝ սպանելով իրավապահ մարմինների մի շարք ղեկավարների:

Գիշերվա ընթացքում սպանվել են Ինգուշիայի ներքին գործերի նախարարի պաշտոնակատար Աբուկար Կոստոնը՝ իր թիկնազորով, նրա տեղակալ Ջյաուդին Կո-

¹ Հարկ է նշել, որ, ըստ ամենայնի, մայիսի 9-ը չեչեն գրոհայինների մոտ յուրահատուկ կերպ է ընկալվում: Հիշեցնենք, որ 2002թ. մայիսի 9-ին Դադստանի Կասպիյսկ քաղաքում անցկացվող շքերթի ժամանակ տեղի ունեցած պայթյունի հետևանքով զոհվեցին 43 հոգի:

² Թեև Ինգուշիայի մայրաքաղաքը 1990-ական թթ. կեսերին դարձավ նորակառույց Մագասը (Ինգուշիայի Հանրապետության նախագահ Մուրադ Ջյազիկովի նստավայրը Մագասում է), սակայն Նազրանը շարունակում է հանդիսանալ այդ հանրապետության ամենամեծ և գլխավոր քաղաքը:

³ Մոտավորապես մեկ ժամ անց հարձակման են ենթարկվել նաև Սլեպցովսկայա և Օրջոնիկիձևսկայա բնակավայրերը (*станции*):

⁴ Ինգուշիայի ներքին գործերի նախարարության կենտրոնական ապարատի վրա հարձակման տեղեկությունը Մոսկվա է հասել տեղի ժամանակով 22:30-ին:

⁵ Ս.թ. հունիսի 22-ին Ռուսաստանի Դաշնության ներքին գործերի նախարար Ռաշիդ Նուրգալիևը հայտնեց, թե նախորդ օրը և գիշերվա ընթացքում Ինգուշիայում «հարձակման են ենթարկվել ութ կետեր»:

տոնը, Նազրան քաղաքի դատախազ Մուխարբեկ Բուզուրտանովը, նրա տեղակալներ Արապինն ու Վեձիժնը, Նազրանի շրջանի դատախազ Բիսլան Օզինը, Ինգուշիայի դատախազության կարևոր գործերով քննիչ Թիմուր Գետագազովը և այլք: Ընդհանուր առմամբ սպանվել են իրավապահ մարմինների 98 աշխատակիցներ, մինչդեռ գրոհայինների կորուստներից հայտնի է Նազրանում սպանված երկու հոգու մասին միայն:

Ս.թ. հուլիսի 13-ին Գրոզնիում մահափորձ կատարվեց Չեչնիայի նախագահի պաշտոնակատար (Կադիրովի օրոք՝ վարչապետ) Սերգեյ Աբրամովի նկատմամբ: Աբրամովը փրկվեց, սակայն զոհվեց վերջինիս թիկնազորի անդամ, «Ալֆա» հատուկ նշանակության ջոկատի ենթասպա Սերգեյ Ցապլինը. ֆուգասը պայթել էր թիկնազորին պատկանող *Bozra* ավտոմեքենայի մոտ:

Ս.թ. օգոստոսի 21-ին՝ մի քանի հարյուր (ենթադրվում է՝ 200-300) գրոհայիններ (գերազանցապես՝ չեչեններ) հարձակումներ գործեցին Գրոզնիի մի քանի ընտրատեղամասերի և անվտանգության ուժերի (իրավապահ մարմիններ, անվտանգության ծառայություն, բանակ) կայանների վրա: Հատկանշական է, որ գրոհայինները հետևել են նույն մարտավարությանը, ինչ հունիսի 21-ի լույս 22-ի գիշերը Ինգուշիայում տեղի ունեցած դեպքերի ժամանակ: Ըստ պաշտոնական տվյալների, դաշնային ուժերը տվել են 42 սպանված: Ըստ ոչ պաշտոնական տվյալների, այդ թիվը հասնում է 100-ի:

Ս.թ. օգոստոսի 24-ին Մոսկվայում, Կաշիրսկոյե մայրուղու վրա գտնվող ավտոբուսի կանգառում ռումբ պայթեցվեց: Ձոռեր չեղան, վիրավորվեցին չորս հոգի²:

Նույն օրը՝ օգոստոսի 24-ի երեկոյան, Մոսկվայի ժամանակով 23:00-ին, մեկ բուպե տարբերությամբ³ ռադարների էկրաններից անհետացան Մոսկվայի «Դոմոդեդովո» օդանավակայանից դեպի Վոլգոգրադ թռչող *Ty-134* և դեպի Սոչի թռչող *Ty-154* ինքնաթիռները: Ըստ պաշտոնական հաղորդագրության, ինքնաթիռներն օդում պայթեցրել⁴ են ինքնասպան ահաբեկիչները: Ձոռերի ընդհանուր թիվը կազմել է 89 հոգի⁵:

¹ Ութ օր անց՝ օգոստոսի 29-ին, Չեչնիայում կայանալու էին նախագահական ընտրություններ:

² Հիշեցնենք, որ նույն Կաշիրսկոյե մայրուղու վրա 1999թ. սեպտեմբերի 13-ին պայթեցվեց բնակելի մի շենք, որի արդյունքում զոհվեցին 124 հոգի: Դեպքից 4 օր առաջ՝ սեպտեմբերի 9-ին, Մոսկվայի Գուրյանով փողոցում պայթեցվել էր ևս մեկ բնակելի շենք, որի արդյունքում զոհվել էին 109 հոգի: Նույն՝ 1999թ. օգոստոսի 2-ին սկսվել էր չեչենական երկրորդ պատերազմը, օգոստոսի 9-ին ՌԴ նախագահ Բորիս Ելցինը ԱԴԾ տնօրեն Վլադիմիր Պուտինին նշանակեց ՌԴ վարչապետի պաշտոնակատար՝ այդ պաշտոնից ազատելով Սերգեյ Ստեպաշինին:

³ Այլ տվյալներով՝ 3 բուպե:

⁴ Վոլգոգրադ թռչող *Ty-134*-ը ընկել է Տուլայի մարզում, իսկ Սոչի թռչող *Ty-154*-ը՝ Ռոստովի մարզում:

⁵ Ըստ Միջպետական ավիացիոն հանձնաժողովի, զոռերի թիվը կազմել է 93 հոգի: Պետք է ենթադրել, որ «ավելացած» չորս հոգին ինքնաթիռներում են գտնվել ապօրինի կերպով, հավանաբար՝ կաշառքի միջոցով:

Ս.թ. օգոստոսի 31-ին Մոսկվայի մետրոյի *Рижская* կայարանի մուտքի մոտ ինքնասպան ահաբեկչի կողմից ռումբի պայթյունի հետևանքով զոհվեցին 10, վիրավորվեցին 51 հոգի:

Ս.թ. սեպտեմբերի 1-ին, տեղի ժամանակով 09:03-ին, գրոհայինների 32 հոգանոց զորաջոկատը Հյուսիսային Օսիայի Բեսլան քաղաքի թիվ 1 միջնակարգ դպրոցում պատանդ է վերցնում շուրջ 1 200 մարդու (մեծամասնությունը՝ երեխաներ): Իրավիճակը իրավարտն է գտնում սեպտեմբերի 3-ին, երբ ռուսական հատուկ նշանակության «Ալֆա» և «Վիմպել» ջոկատները տեղական ժամանակով մոտավորապես 13:10-ին սկսում են դպրոցի շենքի գրոհը:

Ս.թ. հոկտեմբերի 1-ի դրությամբ ՌԴ արտակարգ իրավիճակների նախարարության տվյալներով՝ բեսլանյան ողբերգության արդյունքում զոհվել են 331 հոգի, այդ թվում՝ 172 երեխա: Բեսլանի ուսուցչական հանձնաժողովի տվյալներով՝ պատանդների թիվը իրականում կազմել է 1221 հոգի:

Մարտավարական հետևություններ

Վերը ներկայացվածից կարելի է կատարել մի շարք օպերատիվ հետևություններ, որոնք թույլ են տալիս ընդհանրացնել «հում տեղեկատվությունը»:

Ահմադ Կադիրովի սպանությունը

Ահմադ Կադիրովի սպանությունը վկայում է, որ ռուսների կողմից Չեչնիայում հաստատված անվտանգության ցանցն ունի էական թերություններ: Հիմնական թերությունն այն է, որ Կրեմլին այդպես էլ չի հաջողվում դաշնության այդ սուբյեկտում ստեղծել համառուսաստանյան անվտանգության կառույցի չափանիշներին համահունչ և գաղափարախոսական (ՌԴ անվտանգության համակարգի գաղափարախոսության) առումով մեկ ընդհանուրի մաս կազմող անվտանգության համակարգ:

Փաստորեն, կենտրոնը ստիպված է Չեչնիայում բացառություն անել և որոշակի առումով գործել տեղի անվտանգության համակարգի կանոններով, ինչն իր բնույթով խորթ լինելով համառուսական անվտանգության համակարգին՝ Մոսկվայի համար Չեչնիայում ստեղծում է բավականին լուրջ խնդիրներ¹:

¹ Կրեմլի քաղաքականությունը Չեչնիայում՝ հենվել «հավատարիմ» թեյփերի (ցեղերի) վրա (Ահմադ Կադիրով և նրա համախոհներ)՝ ընդդեմ «թշնամի» թեյփերի, ուստի և չեչենների բաժանումը թշնամու և ոչ թշնամու, չի կարող անվտանգության ամուր համակարգի ստեղծման հիմք հանդիսանալ:

Որպես ասվածը հաստատող փաստարկներ՝ ուշադրություն ենք հրավիրում հետևյալ հանգամանքների վրա:

Առաջին՝ Շամիլ Բասսաևի և Ասլան Մասխադովի ծրագրավորման կենտրոններին վաղօրոք հայտնի էին Ահմադ Կադիրովի գտնվելու վայրը և ժամանակը: Ընդ որում, նման տեղեկությունները գաղտնի են պահվել անգամ Չեչնիայի նախագահի աշխատակազմում: Այնտեղ առկա տեղեկությունների համաձայն, Ա.Կադիրովը, որը մայիսի 7-ին Կրեմլում ներկա էր Վ.Պուտինի՝ Ռուսաստանի նախագահի պաշտոնում վերընտրվելու կապակցությամբ երդման արարողությանը, պետք է Գրոզնի վերադառնար միայն մայիսի 10-ին:

Երկրորդ՝ Բասսաևի կողմնակիցներին հաջողվել է պահակակետերից անցկացնել *բավականին քանակությամբ* պայթուցիկ և իրականացնել պայթյունը:

Թեև ռուսական անվտանգության մարմինները շտապեցին առաջ քաշել այն վարկածը, թե պայթուցիկը Գրոզնիի «Դինամո» մարզադաշտի *VIP*-նստելատեղերի տակ տեղադրված է եղել դեռևս մեկ տարի առաջ, երբ իրականացվում էր մարզադաշտի վերանորոգումը, սակայն, մեր կարծիքով, նման վարկածի ներկայացումը պարզապես միտված է կոծկելու սեփական բացթողումները: Նման կարգի միջոցառումներից առաջ, երբ սպասվում է հանրապետության նախագահի այցը, վերջինիս անվտանգության ծառայությունը ստուգման է ենթարկում այցելության վայրը (դա մանրակրկիտ արվում է հատկապես Չեչնիայում):

Երրորդ՝ առաջին երկու կետերը վկայում են, որ Ա.Կադիրովի մերձավորագույն շրջապատում (պետք չէ բացառել նաև Չեչնիայում գործող անվտանգության դաշնային մարմիններում) շոշափելի կերպով ներկայացված է Շ.Բասսաևի և Ա.Մասխադովի հետախուզությունը: Ջրկված լինելով տեխնիկական անհրաժեշտ միջոցներից՝ չեչեն գրոհայինների հետախուզությունը գերազանցապես պետք է հիմնված լինի, այսպես կոչված, «խլուրդների» աշխատանքի վրա, որոնք էլ ապահովում են կարևոր տեղեկատվության զգալի մասը:

Նույն՝ հուլիսի 13-ի մահափորձը Չեչնիայի նախագահի պաշտոնակատար Սերգեյ Աբրամովի դեմ կարող է վկայել այս երեք կետերի մասին. գրոհայիններին վաղօրոք հայտնի էր Աբրամովի գտնվելու վայրի և ժամանակի մասին:

Նախագահական ընտրությունները Չեչնիայում

Օգոստոսի 29-ին Չեչնիայում կայացած նախագահական ընտրություններն ի ցույց դրեցին տեղի «առանձնահատկությունները»:

Թեև Ահմադ Կադիրովի սպանությունը վերջինիս կլանից վերցրեց հանրապետության նախագահի պաշտոնը, սակայն Կադիրովների թեյփից (ցեղ)՝ Բենոյ, և Ահմադ Կադիրովի համախոհներից կազմված այդ կլանը շարունակում է, ըստ ամենայնի, հանդիսանալ չեչենական ամենաուժեղ խմբավորումը:

Չոր սպանությունից հետո կլանի ղեկավարությունն անցել է Ահմադ Կադիրովի կրտսեր որդի Ռամզան Կադիրովին (28 տարեկան է), և այդ առումով խոսուն փաստ է վերջինիս նշանակումը Չեչնիայի առաջին փոխվարչապետի պաշտոնում, որը պետք է զբաղվի կառավարության ուժային թևով: Նշենք, որ, ըստ տարբեր գնահատականների, Ռամզան Կադիրովի, որը նախկինում հոր անվտանգության ծառայության ղեկավարն էր, ենթակայության տակ գտնվող ուժերը կազմում են 3-6 հազար մարդ՝ օրենքի շրջանակներում գործող չեչենական, թերևս, ամենամեծ զինված կազմավորումը¹:

Կադիրովների Բենոյ թեյփը և կլանն, ընդհանուր առմամբ, Չեչնիայում տիրապետում են շոշափելի ֆինանսատնտեսական կարողությունների: Կլանին ուժ է տալիս նաև այն, որ նույն գրոհայինների շրջանում այն ուներ (ըստ ամենայնի, այժմ էլ ունի) բավականին ազդեցիկ ներկայացուցիչներ. Ասլան Մասխադովի օրոք Իչկերիայի Հանրապետության պաշտպանության նախարարն էր Մահոմեդ Խամբիևը՝ Բենոյ թեյփի անդամ²:

Ուստի պատահական չէ, որ, ըստ որոշ տեղեկությունների, Ռամզան Կադիրովը որոշեց «անձամբ»³ մասնակցել նախագահական ընտրություններին՝ առաջադրելով Ահմադ Կադիրովի աշխատակազմում որպես խորհրդական աշխատող Վախի Վիսաևի թեկնածությունը⁴: Նպատակը՝ հոր սպանությունից հետո քաղաքական ազդեցության պահպանումն էր կամ, ավելի ճիշտ՝ հնարավորինս պահպանումը: Ըստ ամենայնի, Կրեմլի ճնշմամբ և առաջին փոխվարչապետի պաշտոնի դիմաց՝ կրտսեր Կադիրովը այնուհետև հանդես եկավ Ալու Ալխանովի թեկնածության օգտին:

Կադիրովների կլանից գատ, Չեչնիայում իրական ուժ են ներկայացնում ևս երկու խմբավորում՝ Յամադան եղբայրների միավորումը և Գրոզնիի նախկին քաղաքապետ,

¹ Ահմադ Կադիրովն ունի նաև ավագ որդի՝ Ջելիմխան Կադիրովը, որն աշխատում է հանրապետության ներքին գործերի համակարգում: Նա հայտնի է իր բացասական վարքագծով: Օրինակ, 2003թ. ընթացքում ծեծկոտուքներ կազմակերպելու համար, որոնցից մեկն ուղեկցվել է ավտոմատային հրաձգությամբ, նրան երկու անգամ ձերբակալել է Գիսլովոդսկի ոստիկանությունը: Նրա նկատմամբ մեղադրանք էր առաջադրվել խուլիգանության համար, սակայն գործը կոծկվել է:

² Չպետք է մոռանալ, որ մինչև 1999թ. չեչենական երկրորդ պատերազմը, ինքը՝ Ահմադ Կադիրովը, հանդիսանալով Չեչնիայի հոգևոր առաջնորդ՝ մուֆտի, կանգնած էր Ասլան Մասխադովի կողքին:

³ Ըստ օրենքի, Չեչնիայի նախագահ կարող է ընտրվել 30 տարին լրացրած անձնավորությունը, իսկ Ռամզան Կադիրովը, ինչպես նշվեց, 28 տարեկան է:

⁴ Օրինակ, Գուդերմեսում փակցված նախընտրական պատաստանների վրա Վախի Վիսաևը պատկերված էր Ռամզան Կադիրովի հետ միասին:

չեչենական երկու պատերազմներին դաշնային ուժերի կողքին հանդես եկած ու, ըստ էության, չեչենական հետխորհրդային վերնախավին մշտապես ընդդիմադիր Բիսլան Գանտամիրովի միավորումը:

Յամադանների ուժային թևը հանդիսանում է հատուկ նշանակության Восток գումարտակը, որի հրամանատարն է Վեդենոյում սպանված և Ռուսաստանի հերոսի կոչման արժանացած Ջաբրայիլ Յամադանի կրտսեր եղբայր Սուլիմ Յամադանը (նախկին դաշտային հրամանատար): Յամադան եղբայրներից երրորդը՝ Ռուսլան Յամադանը, *Единая Россия* կուսակցության անդամ է և ՌԴ Պետդումայի պատգամավոր: Յամադանների ազդեցությունը հատկապես մեծ է Չեչնիայի երկրորդ քաղաքում՝ Գուդերմեսում. 1999թ. Յամադաններն ապահովեցին քաղաքի անարյուն հանձնումը դաշնային ուժերին:

Բիսլան Գանտամիրովի ուժային կառույցը հանդիսանում հատուկ նշանակության *Запад* գումարտակը, որի հրամանատարն է Սայիդմոհամեդ Կակիևը: Վերջինս հայտնի է Չեչնիայի նախկին նախագահ Ջոհար Դուդանի դեմ իրականացրած մահափորձով (այդ ժամանակ Կակիևը կորցրեց մի աչքը և ձեռքը):

Բիսլան Գանտամիրովի ազդեցությունը հիմնականում տարածվում է Թերեք գետից հյուսիս ընկած չեչենական տարածքներում (Հյուսիսային (Հարթավայրային) Չեչնիա), որոնք մինչև 1950-ական թթ. վերջը մտնում էին Ստավրոպոլի երկրամասի կազմի մեջ և, ի տարբերություն Լեոնային (Հարավային) Չեչնիայի, գերազանցապես լոյալ են Մոսկվայի նկատմամբ:

Հայտնի են Գանտամիրովի խմբավորման հակասությունները Կադիրովների կլանի հետ: Այդ հողի վրա բազմիցս են արձանագրվել բախումներ *Запад* գումարտակի և Ռամզան Կադիրովի ուժերի միջև: Թեև դաշնային կենտրոնի միջամտությամբ խնդիրները կարծես թե կարգավորվել են, սակայն հակասությունները վերջնականապես հարթված չեն:

Եվ վերջապես, Չեչնիայի ներկայիս նախագահ Ալու Ալխանովի գործոնը: Հավանական է, որ որոշ ժամանակ անց նա փորձելու է ստեղծել իր խմբավորումը՝ սեփական քաղաքական կշիռն ամրապնդելու և Կադիրովների կլանի վերահսկողությունից կամ ազդեցությունից դուրս գալու համար: Այդ տեսանկյունից բացառված չեն հակասությունները Ալու Ալխանով-Ռամզան Կադիրով գույզի միջև:

Ինգուշիայի դեպքերը

Ս.թ. հունիսի 21-ի լույս 22-ի գիշերը Ինգուշիայում տեղի ունեցած իրադարձությունն իր բնույթով շատ ավելի կարևոր է, քան ս.թ. սեպտեմբերի 1-3-ը հյուսիսօսական

Բեւլան քաղաքում կատարվածը: Բեւլանյան իրադարձությունը արժանացավ տեղեկատվական շատ ավելի մեծ ուշադրության, ուստի այն կարող է սխալմամբ թվալ որպես իրավիճակի ցուցիչ: Իրավիճակն Ինգուշիայում հատկապես կարևոր է այն առումով (հարկ է դիտարկել որպես ցուցիչ), որ այն հանդես է գալիս որպես յուրատեսակ կապող օղակ (իր բնույթով) մի կողմից՝ Չեչնիայում, մյուս կողմից՝ հյուսիսկովկասյան այլ հանրապետություններում (Դաղստան, Հյուսիսային Օսիա, Կաբարդինա-Բալկարիա, Կարաչանա-Չերկեսիա, *Աբխազիա*) տիրող իրավիճակների միջև:

Չպետք է մոռանալ, որ մոտ 70 տարի Չեչնիան և Ինգուշիան մեկ հանրապետություն էին (ընդհանուր պետություն), ուստի բնական է, որ իրավիճակն Ինգուշիայում զգալիորեն կապված է Չեչնիայում տիրող իրավիճակի հետ:

Սակայն Ինգուշիայում տեղի ունեցած հունիսյան դեպքերի հիմքում ընկած է նաև տեղի վերնախավի փոփոխության գործընթացը, որն սկսվեց Ինգուշիայի Հանրապետության նախագահի պաշտոնում Ռուսլան Աուշևին (որը հայտնի էր չեչեն գրոհայինների նկատմամբ իր լոյալությամբ) Մուրադ Զյազիկովի փոխարինմամբ: Հետևանքները երկար սպասել չտվեցին, և Զյազիկովը ձեռնամուխ եղավ իշխանության տարբեր ճյուղերի (հատկապես ուժային) վերին ու մասնավորապես միջին օղակներում իր մարդկանց նշանակմամբ: Այսինքն՝ սկսվեց ազդեցությունների վերաբաշխում Ինգուշիայի քաղաքական և տնտեսական դաշտերում;

Ըստ որոշ տեղեկությունների, ս.թ. հունիսի 21-ի լոյս 22-ի գիշերը գրոհայինների մեջ առանձնանում էին Ինգուշիայի ներքին գործերի համակարգի աշխատակիցները, որոնք, պետք է ենթադրել, դասվում են Ռուսլան Աուշևի կողմնակիցների թվին: Հիմնականում այդ պատճառով է, որ դեպքերի հետ կապված՝ իրավապահ մամիները չունեցան լուրջ բացահայտումներ¹:

Բեւլանի շուրջ

Բեւլանյան իրադարձությունը ստիպում է ուշադրություն դարձնել երեք հանգամանքի վրա:

Առաջին՝ գրոհայինների կողմից դպրոցի զավթումը ցույց տվեց, որ առկա պայմաններում պահակետերի (*блокпост*) համակարգն արդյունավետ չի աշխատում: Ավելին՝ այն վնաս է պատճառում:

¹ Ըստ ամենայնի, ինգուշական դեպքերի պատճառը ոչ թե «արտաքին» հարձակումն է Չեչնիայից կամ Վրաստանից, այլ ներքին լարվածությունը, ինչպես նաև, բնականաբար, այն, որ Ինգուշիան մաս է կազմում Հյուսիսային Կովկասում առկա իրավիճակի:

Երկրորդ՝ փաստորեն, ահաբեկչական յուրաքանչյուր գործողությունից հետո գրոհայինները փորձում են վերացնել նախորդ անգամվա սեփական բացթողումները.

- Բեալանի թիվ 1 դպրոցում գրոհայինները կազմակերպել էին պայթեցման լրացուցիչ համակարգ, որը գործի էր գցվելու, եթե գրոհի ժամանակ սպանվեր պայթեցման (*ինքնապայթեցման*) համար պատասխանատու գրոհայինը, որի ձեռքը մշտապես պետք է գտնվեր պայթյունը հրահանգող կոճակի վրա,
- ի տարբերություն «Նորդ-Օստի» (հոկտեմբերի 23-26, 2002թ., գոհվեցին 129 հոգի), որտեղ պայթուցիկների մի մասը չէր բերվել մարտական վիճակի, բեալանյան դպրոցում այդ «թերությունը» շտկված էր,
- ըստ տեղեկությունների, դպրոցի շենքի զավթումից անմիջապես հետո գրոհայինները, որոնք հակագազով էին, կազմակերպել էին տարածքի օդափոխության գործը և իրենց հետ տարել շների, որոնք կարող էին անմիջապես զգալ գազի առկայությունն օդում,
- ըստ որոշ տեղեկությունների, գրոհայինների հետ դպրոցի շենքում գտնվող ինքնասպան «սև այրիները» յուրաքանչյուր 3-4 ժամը մեկ երակային ներարկման միջոցով (կաթետերի միջոցով) ինչ-որ նյութ էին ընդունում (ենթադրելի է՝ հոգեմետ). նպատակը, թերևս, «սև այրիների» հավանական փախուստը կանխելն էր, ինչը, ըստ ռուսական անվտանգության մարմինների, տեղի է ունենում ահաբեկչական որոշ գործողությունների ժամանակ:

Երրորդ և ամենակարևորը՝ բեալանյան իրադարձությունը կարող է օս-ինգուշական նոր հակամարտության պատճառ հանդիսանալ: Մ.թ. սեպտեմբերի 3-ի լույս 4-ի գիշերը Վլադիկավկազի (Հյուսիսային Օսիայի մայրաքաղաքը) մոտ գտնվող Սունժա բնակավայրից մոտ 300 *զինված օսեր* շարժվեցին դեպի գերազանցապես ինգուշներով բնակեցված Կարցա գյուղը: Զինված խմբավորման առաջխաղացումը հաջողվել է կասեցնել Հարավային Օսիայի նախագահ Էդուարդ Կոկոյտայի անձնական ջանքերի շնորհիվ:

Ուշագրավ է, որ Հյուսիսային Օսիայում տարածված լուրերի համաձայն, արդեն օգոստոսի 30-31-ին Վլադիկավկազում գրեթե չէր մնացել ոչ մի ինգուշ և չեչեն: Ամեն դեպքում՝ դաշնային կենտրոնը լուրջ ջանքեր է գործադրում իրավիճակը վերահսկողությունից դուրս չթողնելու համար. ուժեղացվել են Հյուսիսային Օսիա-Ինգուշիա սահմանային անցակետերը և սահմանապահ ուղեկալները, ԱԴԾ կենտրոնական մասից հյուսիսօսական և ինգուշական բաժանմունքներ են գործուղվել նոր սպաներ:

Ինգուշիայի Հանրապետություն



Ընդհանրացումներ

Ահմադ Կադիրովի սպանությունը, հունիսյան հարձակումը Ինգուշիայում և բեսլանյան իրադարձությունը ցույց են տալիս, որ Ռուսաստանի անվտանգության համակարգը Հյուսիսային Կովկասում գործում է փոքր արդյունավետությամբ՝ անվտանգության ցանցը (կառուցվածքային առումով) գրեթե չի աշխատում, կամ՝ ձևավորված անվտանգության համակարգում դաշնային կենտրոնն ունի սահմանափակ ազդեցություն: Եթե նկատի ունենանք, որ ներկայում անվտանգության առումով Հյուսիսային Կովկասը հանդիսանում է ՌԴ ամենաթեժ ուղղությունը, և, ինչպես մենք տեսնում ենք, Մոսկվան այստեղ ունի բավականին լուրջ բացթողումներ, ապա կարելի է եզրակացնել, որ, ընդհանուր առմամբ, ՌԴ պետանվտանգության համակարգը գտնվում է ցածր մակարդակի վրա:


Նման իրավիճակի հիմնական պատճառը ԽՍՀՄ փլուզմամբ զուգորդվող և այդ փլուզումից հետո էլ ավելի արագացած պետանվտանգության համակարգի ընդհանուր քայքայումն էր: 1991թ. ամռանը և 1993թ. աշնանը Ռուսաստանի պետանվտանգության մարմիններում տեղի ունեցավ աշխատակիցների զանգվածային ազատում կամ համակարգից վերջիններիս զանգվածային հեռացում: Արդյունքում՝ ծագեց անհրաժեշտ քանակությամբ և որակով կադրերի խնդիրը: Այսինքն՝ տեղի ունեցավ աշխատանքի արդյունավետության անկում, անգամ՝ կտրուկ անկում: Նույն ռուսական աղբյուրների համաձայն, պետանվտանգության մարմիններում առկա իրավիճակն իր արտացոլումն է գտնում Չեչնիայում, որտեղ գործակալական ցանցի հետ աշխատանքը երբեմն հանգեցնում է հակառակ արդյունքների:

Լուրջ խնդիր է ՌԴ իրավապահ մարմիններում տիրող կոռուպցիան: Գաղտնիք չէ, որ \$5-15-ով Հյուսիսային Կովկասում կարելի է խուսափել, թերևս, բոլոր պահակետերի ստուգումներից: Ըստ ռուսական ՋԼՄ-ի հրապարակումների, անգամ սեպտեմբերի 1-3-ը (բեսլանյան իրադարձության օրերին) միջինը \$40-50-ով կարելի էր, փաստորեն, անարգել հասնել մինչև գործողության վայրը:

Նույն ռուսական լրատվամիջոցների հրապարակման համաձայն, ՌԴ ՆԳՆ Սեփական անվտանգության գլխավոր վարչության շրջանակներում գործում է բանավոր հրաման՝ ուշադրություն չդարձնել \$50 հազ.-ից քիչ կաշառակերության դեպքերին՝ բացառություններ անելով կարևոր գործերով զբաղվողների և նախարարության աշխատակիցների համար:

Ահաբեկչությունը Ռուսաստանի Դաշնությունում


■ Տարվա կտրվածքով զոհերով ահաբեկչական գործողությունների քանակը ՌԴ-ում



■ Տարվա կտրվածքով զոհերի թիվը ՌԴ-ում



■ ՌԴ պետանվտանգության մարմիններին հատկացված գումարի չափը (մլրդ ռուբլի)



Նման պայմաններում, թերևս, հասկանալի է դառնում «Վերին Լարս» անցակետի փակումը: ՌԴ պետանվտանգության համակարգը, բացի նման կարգի հրամաններից, փաստորեն, ի վիճակի չէ տեղերում արդյունավետությամբ կատարել իր վրա դրված պարտականությունները¹:

Ստեղծված իրավիճակը դրդում է դաշնային կենտրոնին պետանվտանգության համակարգում իրականացվող բարեփոխումների հարցում զգալի ուժեր կենտրոնացնել հյուսիսկովկասյան ուղղությամբ: Այս աշնանից Հարավային դաշնային շրջանում (ՀԴՇ, ռուս.՝ *ЮФО, Южный федеральный округ*) կրկին ստեղծվելու են տեղերում ուժային կառույցների գործունեությունը համակարգող օպերատիվ կառավարման խմբերը: Դեռևս ս.թ. օգոստոսի կեսերին ՌԴ նախագահին են ներկայացվել ՆԳՆ այն գնդապետները, որոնք պետք է մեկնեն ՀԴՇ՝ որպես այդ խմբերի ղեկավարներ, միաժամանակ հանդիսանալով ՌԴ ՀԴՇ 13 սուբյեկտներում գործող հակաահաբեկչական հանձնաժողովների ղեկավարների² առաջին տեղակալները: Նրանց տրամադրության տակ են դրվելու միջինը 70 հոգուց բաղկացած հատուկ նշանակության ջոկատներ:

Հարկ է առանձնացնել նաև ՌԴ կառավարության աշխատակազմի ղեկավար Դմիտրի Կոզակի նշանակումը ՀԴՇ-ում ՌԴ նախագահի լիազոր ներկայացուցչի և ս.թ. սեպտեմբերի 13-ին ստեղծված ՀԴՇ-ում գործադիր իշխանության դաշնային մարմինների գործունեությունը համակարգող հանձնաժողովի ղեկավար: Դ.Կոզակը համարվում է Վ.Պուտինի ամենամտերիմ մարդկանցից մեկը, որը պետք է գործեր դաշնային մակարդակում, և նրա նոր նշանակումը ցույց է տալիս հյուսիսկովկասյան խնդիրների կարևորությունը Կրեմլի համար:

Մոսկվան ձգտում է պետանվտանգության ոլորտում վերափոխումներ անցկացնել նաև դաշնության մակարդակով: Ս.թ. ամռանը ՌԴ ԱԴԾ-ում կրճատման ենթարկվեցին տնօրենի (ծառայության ղեկավարի) 12 տեղակալները: Ներկայում տեղակալները չորսն են՝ երկու առաջին տեղակալ (որոնցից մեկը Մահմանապահ ծառայության ղեկավարն է) և երկու տեղակալ: Տեղակալների կրճատումը կարող է հանգեցնել համակարգային փոփոխությունների: Օրինակ՝ նախատեսվում է, որ ԱԴԾ-ում գործող դեպարտամենտները վերակազմավորվելու են ծառայությունների՝ գործառնական որոշակի վերափոխումներով հանդերձ:

¹ Նշենք, որ «Վերին Լարս» անցակետի փակման գործողությունը գտնվում էր ԱԴԾ իրավասության ներքո:

² Հակաահաբեկչական հանձնաժողովները ղեկավարելու են ՌԴ ՀԴՇ 13 սուբյեկտների առաջին դեմքերը՝ նահանգապետեր, նախագահներ:

Ի վերջո, քիչ հավանական է, որ առաջիկա 1-2 տարիների ընթացքում ՌԴ պետանվտանգության համակարգը, գտնվելով առկա իրավիճակում և իր վրա կրելով ընթացող վերափոխումները, կարողանա արդյունավետորեն դիմագրավել գոյություն ունեցող մարտահրավերները: Այդ առումով առաջին լուրջ արդյունքները կարելի է սպասել նշված ժամկետի վերջում: Իսկ ներկայում գերիշխելու են գերազանցապես կոշտ և ոչ այնքան արդյունավետ միջոցները (օրինակ՝ նույն «Վերին Լարսի» փակումը կամ մաքրագոտումները Չեչնիայում, Ինգուշիայում):

Ռազմավարական հետևություններ

Ներկայացվածը թույլ է տալիս կատարել որոշակի հետևություններ, որոնք պայմանականորեն կարելի է բաժանել երկու մասի:

Համակարգային մարտահրավերի խնդիրը

Չնայած անցած հինգ տարիներին Վ.Պուտինի պաշտոնավարման¹ ժամանակ գործադրած ջանքերին, Ռուսաստանը, փաստորեն, շարունակում է գտնվել համակարգային ճգնաժամի մեջ: Անուղղակի կերպով այդ են վկայում ս.թ. սեպտեմբերի 4-ի ՌԴ նախագահի հեռուստաելույթը և նրա իսկ առաջարկությունները՝ արված ս.թ. սեպտեմբերի 13-ին ՌԴ կառավարության ընդլայնված նիստում²: Կրեմլի նոր առաջարկությունների նպատակը մեկն է՝ Ռուսաստանի կառավարման կառույցում փոփոխությունների օգնությամբ հնարավորինս վերացնել ԽՍՀՄ փլուզումից հետո ի հայտ եկած համակարգային խնդիրները, որոնք անցած տասներեք տարիների ընթացքում, փաստորեն, վերաճել են բավականին լուրջ մարտահրավերների՝ հարցականի տակ դնելով անգամ ՌԴ տարածքային ամբողջականությունը³:

¹ Հարկ է Վ.Պուտինի պաշտոնավարման ժամկետը հաշվել 1999թ. օգոստոսի 9-ից, երբ ՌԴ նախագահ Բորիս Ելցինը ԱԴԾ տնօրեն Վլադիմիր Պուտինին նշանակեց ՌԴ վարչապետի պաշտոնակատար՝ վարչապետի պաշտոնից ազատելով Սերգեյ Ստեպաշինին: Այդ նշանակումից հետո Վ.Պուտինը երկու անգամ՝ 2000թ. մարտի 26-ին և 2004թ. մարտի 14-ին, ընտրվել է ՌԴ նախագահ:

² Հիշեցնենք, որ այդ առաջարկությունների մեջ էական տեղ գրավեցին հետևյալ դրույթները. ՌԴ բոլոր՝ 89 սուբյեկտների ղեկավարները, ըստ էության, պետք է նշանակվեն ՌԴ նախագահի կողմից, այլ ոչ թե ընտրվեն, ինչպես ներկայում է, և ՌԴ Պետդոման պետք է ձևավորվի միայն համամասնական կարգով (կուսակցական ցուցակներով):

³ Ըստ էության, Կրեմլի նոր նախաձեռնությունների (Կրեմլի կատարած եզրակացության) հիմքում ընկած է հետևյալ դրույթը. անգամ Չեչնիայի խնդրի ռազմաքաղաքական լուծումից հետո Ռուսաստանում առկա համակարգը՝ գաղափարախոսական, կառուցվածքային, քաղաքական (*տնտեսակա՞ն*), նպաստավոր պայմաններ է ստեղծում ՌԴ կազմալուծման համար:

Գոյություն ունեցող իրավիճակը հատկապես արտացոլվում է Հյուսիսային Կովկասում ընթացող քաղաքական գործընթացներում: Դեռևս 1970-ական թթ. վերջից – 1980-ական թթ. սկզբից այնտեղ սկսվեց ներկայում գոյություն ունեցող քաղաքական համակարգի ձևավորումը, որը հատկապես արագացավ Խորհրդային Միության փլուզումից հետո: Այդ համակարգի էությունն է ինստիտուցիոնալացված ցեղային-կլանային բուրգը, որը որպես գաղափարախոսություն վերցրեց ազգային անկախության վերաբերյալ դրույթը, ինչն, անշուշտ, դաշնային կենտրոնի գաղափարախոսական դաշտի փլուզման նշան էր:

Նշված համակարգը, որն իր տրամաբանությամբ խորթ է դաշնության քաղաքական համակարգին, լուրջ խոչընդոտ է տեղերում դաշնային կենտրոնի քաղաքականության իրականացման համար: Եվ պետք է փաստել, որ մինչ օրս Կրեմլը չի կարողացել վերջնականապես լուծել իր համար գոյություն ունեցող այդ խնդիրը¹: Ուստի, տարօրինակ չպետք է թվա, թե ինչ բարձր մակարդակով դաշնային կենտրոնը լուծեց իշխանափոխության հարցը Չեչնիայում, երբ ս.թ. օգոստոսի 22-ին Սոչիում Վլադիմիր Պուտինը հանդիպեց Ալու Ալխանովի² և Ռամզան Կադիրովի հետ³:

Հիմնական խնդիրը, որն առաջիկա տարիներին Մոսկվան ուղղակի ստիպված է լուծել, Ռուսաստանի նոր (*պետական*⁴) գաղափարախոսության հարցն է: Ընդ որում, այդ գաղափարախոսությունն իր խորությամբ և արժեհամակարգով պետք է գերազանցի ազգային գաղափարախոսական դրույթներին, իսկ իսլամ դավանող ազգերի պարագայում՝ նաև կրոնական գաղափարախոսական դրույթներին, այլապես՝ Կրեմլը չի կարող լուծել ԽՍՀՄ փլուզումից հետո իր առջև ծառայած այդ ամենահիմնական մարտահրավերը՝ գաղափարախոսության հարցը⁴:

Այստեղ հարկ է ուշադրություն դարձնել այն հազամանքի վրա, որ, ըստ էության, մոտ են այդ մարտահրավերին բախվելու (կամ արդեն իսկ բախվել են) եվրասիական

¹ Բավականին ցայտուն կերպով այդ խնդիրը դրսևորվեց ս.թ. հոկտեմբերի 3-ին Աբխազիայում կայացած նախագահական ընտրությունների առնչությամբ. Կրեմլի թեկնածուն գործող վարչապետ Ռաուլ Խաչիբան (ընտրություններից առաջ ս.թ. օգոստոսի 29-ին, Սոչիի մոտ գտնվող «Դագոմիս» առողջարանային համալիրում Վլադիմիր Պուտինը ցուցադրաբար հանդիպեց Ռաուլ Խաչիբայի հետ), փաստացի պարտվել է «ընդդիմության» թեկնածուի՝ նախկին վարչապետ, Կերոմորձեբո պետական ընկերության գլխավոր տնօրեն Մերգել Բագապչին:

² Ս.թ. օգոստոսի 29-ին Ալու Ալխանովը ընտրվեց Չեչնիայի նախագահ:

³ Ստեղծված իրավիճակից Կրեմլը, թերևս, փորձում է նախ և առաջ դուրս գալ տեղի վերնախավերի փոփոխությամբ: Վերջին տարիներին հյուսիսկովկասյան տարածաշրջանում իշխանության եկան մարդիկ, որոնք ավելի հավատարիմ են դաշնային կենտրոնին՝ Ալեքսանդր Չասոխով (Հյուսիսային Օսիա, նախագահ է ընտրվել 1998թ. հունվարի 10-ին, չորս տարով վերընտրվել է 2002թ. հունվարի 27-ին), Մուրատ Զյազիկով (Ինգուշիա, նախագահ է ընտրվել 2002թ. ապրիլի 7-ին), Ալու Ալխանով (Չեչնիա, նախագահ է ընտրվել 2004թ. օգոստոսի 29-ին): Այդ ցուցակին, թերևս, կարելի է ավելացնել նաև Մերգել Բագապչի անունը (անշուշտ, եթե նա վերջնականապես հաղթանակ տանի): Ընդհանուր առմամբ, Կրեմլի համար Հյուսիսային Կովկասում գոյություն ունի վերնախավերի փոփոխության խնդիրը:

⁴ Փաստորեն, նույն գաղափարախոսական մարտահրավերն էր, որը փլուզեց Խորհրդային Միությունը:

մյուս հսկաները՝ Եվրամիությունը (ԵՄ)¹, Չինաստանը և իսլամական աշխարհը²: Փոխարենը, այն որպես զենք է կիրառում նրանց աշխարհաքաղաքական հակառակորդը՝ Միացյալ Նահանգները³, որը նպատակ ունի կանխել իրենից ավելի ուժեղ աշխարհաքաղաքական միավորի ի հայտ գալը⁴:

Աշխարհաքաղաքական շարժերը

Հյուսիսային Կովկասի «ակտիվացման» գործում էական պատճառ են այն աշխարհաքաղաքական շարժերը, որոնք սկզբնավորվել են կովկասյան տարածաշրջանում վերջին մեկ-երկու տարիների ընթացքում:

Թերևս, գործընթացը սկսվել է Մոսկվայի նախաձեռնությամբ, որը մոտավորապես 1999-2000թթ. նպատակ դրեց վճռական առավելության հասնել աշխարհառազմավարական (գեոստրատեգիա) առումով կարևոր երկու երկրներում՝ Ուկրաինայում և Վրաստանում՝ կանխելու նրանց վերջնական հեռացումը Ռուսաստանից: Թե՛ Ուկրաինայում, թե՛ Վրաստանում ռուսական այդ նախաձեռնությունն արտահայտվեց իշխող վերնախավերում Մոսկվայի ազդեցության մեծացմամբ, ինչն էլ որոշակի առումով իր արտացոլումը ստացավ այդ երկրների արտաքին քաղաքականության մեջ:

Վրաստանում, սակայն, այդ գործընթացը, փաստորեն, ավարտվեց Ռուսաստանի անհաջողությամբ. Շևարդնաձեն հրաժարական տվեց, իշխանության եկավ Արևմուտքի «մարդը» համարվող Սահակաշվիլին:

Ուկրաինայում այդ գործընթացը շարունակվում է և իր հանգուցալուծումը կստանա ս.թ. հոկտեմբերի 31-ի նախագահական ընտրություններով (Յանուկևիչ (Ռուսաստան) – Յուշչենկո (ԱՄՆ, Եվրամիություն⁵)):

Կովկասի պարագայում, ընդհանուր առմամբ, Մոսկվան ունեցավ որոշակի հաջողություններ. աննախադեպ մեծացավ Ռուսաստանի ազդեցությունը Հայաստանում (հայ-ռուսական ռազմական համագործակցության խորացումը և վերջին շրջանի տնտե-

¹ Թերևս, այս կերպ կարելի բացատրել ԵՄ վերլուծական մարմիններում առկա այն կարծիքը, թե ԵՄ-ին հարևան հակամարտությունները (մասնավորապես, Հարավային Կովկասի պարագայում) հարկ է գերազանցապես լուծել ելնելով տարածքային ամբողջականության պահպանման սկզբունքից:

² Ի դեպ, նաև այդ հանգամանքը կարող է նպաստել նրանց աշխարհաքաղաքական գծերի մերձեցմանը՝ հիմքում ունենալով ազգային-անկախական շարժումները կանխելու նպատակը:

³ Այդ առումով, Միացյալ Նահանգներից գատ, կարելի է նշել նաև նրա դաշնակիցներ Մեծ Բրիտանիայի, Իսրայելի, անգամ՝ Ավստրալիայի անունները:

⁴ Մերձավոր Արևելքում Վաշինգտոնի վարած «ատոմիզացիայի» ռազմավարությունը, որի հիմնական նպատակն է ազգային պետությունների կամ միավորների ստեղծման միջոցով կանխել ազգ-պետություն միավորից ավելի բարձր համակարգի («կայսրության», Մերձավոր Արևելքի դեպքում՝ «իսլամական կայսրության») երևան գալը (օրինակ՝ «Նոր իսլամիզմ»), կարելի է մեծ հաջողությամբ կիրառել նաև Եվրամիության, Ռուսաստանի և Չինաստանի պարագաներում:

սական գործարքները), 2003թ. հոկտեմբերի 15-ին Իլիամ Ալիևի ընտրությունը Ադրբեյջանի նախագահի պաշտոնում, երբ Ռուսաստանը, փաստորեն, պաշտպանեց ադրբեյջանական վերնախավի թեկնածուին՝ Իլիամ Ալիևին, նպաստեց ռուս-ադրբեյջանական հարաբերությունների որոշակի ջերմացմանը և, վերջապես, Չեչնիայում սպանվեցին կամ գերի հանձնվեցին գրոհայինների մի շարք հայտնի ղեկավարներ¹:

Բայց իրավիճակը սկսեց փոխվել 2003թ. նոյեմբերին տեղի ունեցած վրացական «վարդերի հեղափոխությամբ», որը հարկավոր է դիտարկել որպես ամերիկյան աշխարհաքաղաքական նախագիծ (*project*): Այնուհետև գործընթացը (աշխարհաքաղաքական ուղղությունը, շարժը) ճակատային մասով հարվածեց Հյուսիսային Կովկասին²: Ռուսաստանի փորձը վրաց-օսական հակամարտության միջոցով հասնել հաջողության՝ առայժմ ունեցել է, փաստորեն, մարտավարական նշանակություն: Փոխարենը, Ահմադ Կադիրովի սպանությամբ, Ինգուշիայում տեղի ունեցած հունիսյան հարձակումով և բեյլանյան դեպքով ստեղծված իրավիճակը «դրդեց» Ռուսաստանին գոնե առժամանակ «փակվել» Հարավային Կովկասից կամ «թողնել» Հարավային Կովկասը:

Պետք է ենթադրել, որ եթե Մոսկվան «Բեսլանին» պատասխանեց «Վերին Լարս» անցակետը փակելով, ապա Հարավային Կովկասում, թերևս, տեղի ունենան աշխարհաքաղաքական լուրջ վերադասավորումներ՝ ոչ հոգուտ Ռուսաստանի: Այդ առումով հարկ է նշել, որ թե՛ Բաքու-Թբիլիսի-Ջեյհան նավթամուղի շահագործումը³, թե՛ Վրաստանում և Ադրբեյջանում ամերիկյան շարժուն զորամիավորումների հնարավոր տեղակայումը, անշուշտ, կմեծացնեն Վաշինգտոնի ազդեցությունը տարածաշրջանում:

Սակայն դեռ վաղ է հանգել որոշակի վերջնական (անգամ այս ժամանակահատվածի համար վերջնական) հետևությունների: Պետք չէ բացառել, որ առաջիկա ձմռան ընթացքում ի հայտ գան նոր հանգամանքներ, որոնք թույլ կտան խոսել ռուսական աշխարհաքաղաքականության մասին:

¹ Փաստորեն, սկսած 1999-2000թթ. Հյուսիսային Կովկասում ռազմավարական նախաձեռնությունն անցավ Կրեմլի ձեռքը, երբ ջախջախվեցին Իչկերիայի Հանրապետության հիմնական ռազմական ուժերը, իսկ քաղաքական առումով Մոսկվան, ընդհանուր առմամբ, ուժեղացրեց վերահսկողությունը ողջ Հյուսիսային Կովկասում: Ավելին՝ նույն ռազմաքաղաքական առումով 2004թ. սկսվեց ոչ հոգուտ գրոհայինների: Ս.թ. մարտին դաշնային ուժերին կամավոր հանձնվեցին Ասլան Մասխադովի մերձավորագույն շրջապատի երեք ներկայացուցիչներ՝ Իչկերիայի պաշտպանության նախարար Մահոմեդ Խամբիևը, գրոհայինների հատուկ բաժնի պետ Բորիս Այդամիրովը և Մասխադովի թիկնազորի պետ Շաա Տուրլանը, իսկ ս.թ. ապրիլին դաշնային ուժերի հետ մարտում զոհվեց Աբու ալ-Վալիդը՝ Խատաբի մահից հետո Չեչնիայում գործող միջազգային ահաբեկիչ-գրոհայինների ղեկավարը:

² Տե՛ս վերը ներկայացված «Հյուսիսային Կովկասի «ակտիվացումը» բաժինը:

³ Նախատեսված է նավթամուղը շահագործման հանձնել 2005թ. հունվարին:

Եզրակացություն. Երևանի գործոնը

Ըստ էության, Հարավային Կովկասը և, մասնավորապես, Հայաստանը մուտք են գործել նոր գործընթացների մի փուլ, որի առանձնահատկությունը կարող է կայանալ տարածաշրջանում գոյություն ունեցող աշխարհաքաղաքական փոխդասավորվածության վերաձևումը: Ընդ որում, ակնհայտ է, որ կովկասյան տարածաշրջանում գործող գրեթե բոլոր ուժի կենտրոնները (ՌԴ, ԱՄՆ, ԵՄ, Իրան, Թուրքիա, անգամ՝ Չինաստան) ձգտում են հասնել էական հաջողությունների, ինչը միջին ժամանակահատվածի (10-20 տարի) կտրվածքով կապահովի սեփական գերիշխանությամբ կամ գերազանցապես սեփական գերիշխանությամբ պայմանավորված status quo-ն՝ ձևավորվելիք նոր համակարգը: Նման ձգտումները պայմանավորված են նաև Արևելյան Եվրոպայում, Մերձավոր Արևելքում և Կենտրոնական ու Հարավային Ասիաներում ընթացող գործընթացներով, որոնք *մոտ են որոշակի նոր համակարգի ձևավորմանը* (*Նոր եվրասիական կարգ, New Eurasian Order*)¹, ուստի Հարավային Կովկասը պարզապես չի կարող դուրս մնալ այդ գործընթացից:

Հավանական է, որ, տարածաշրջանում տեղի ունեցող գործընթացների տրամաբանությանը համաձայն, «ակտիվացումներ» ընթանան հյուսիսկովկասյան այլ հանրապետություններում² ևս, ինչպես նաև Վրաստանում³, Ադրբեյջանում և անգամ՝ Հայաստանում⁴:

Հայաստանը Հարավային Կովկասի միակ երկիրն է, ուր, փաստորեն, ռուսական ազդեցությունը գերիշխում է այլ ուժի կենտրոնների (ԱՄՆ, ԵՄ, Իրան, Թուրքիա) ազդեցությանը: Այդ գործոնը թույլ է տալիս կատարել մի քանի հետևություններ վերոհիշյալի համատեքստում:

¹ «Նոր եվրասիական կարգի» տակ նախ և առաջ պետք է հասկանալ Միացյալ Նահանգների ձգտումը Արևելյան Եվրոպայի, Մերձավոր Արևելքի, Հարավային Կովկասի և Կենտրոնական Ասիայի երկրներից ստեղծել անվտանգության մի համակարգ, որը զուրկ կլինի արդեն իսկ գոյություն ունեցող համակարգերի ազդեցությունից (օրիկան՝ ԵՄ, ՆԱՏՕ, ԱՊՀ և այլն) և որտեղ գերակշիռ կլինի ամերիկյան ազդեցությունը:

² Անհրաժեշտ է նշել, որ «ակտիվացման» համար դրական պայմաններ առկա են հատկապես Դաղստանում, որտեղ, փաստորեն, միջլեռնիկ լարվածության հիմքի վրա իշխող վերնախավի ներքում կան լուրջ հակասություններ: Իրավիճակը հանգիստ չէ նաև Կարաչանա-Չերկեսիայում, որ հոկտեմբերի 18-ին սպանվեց հանրապետության փոխվարչապետ Անսար Տեբուևը (ղեկավարում էր կառավարության ուժային և սոցիալական թևերը), իսկ Կարչանա-Չերկեսիայի նախագահ Մուստաֆա Բատիդևի փեսան Ալի Կայիտովը (Кавказ-цемент ընկերության գլխավոր տնօրեն) ս.թ. հոկտեմբերի 22-ից գտնվում է հետախուզման մեջ՝ տեղի քիմիական ձեռնարկության յոթ բաժնետերերի առևանգման (ս.թ. հոկտեմբերի 11) և սպանության համար:

³ Վրաստանի պարագայում Հայաստանի համար կարող են հատկապես լուրջ խնդիրներ դառնալ հաղորդակցական ուղիների, գազամուղի և Զավախքում տիրող իրավիճակի հարցերը:

⁴ Նշված միտքը կարելի է վերաձևակերպել, թե ժամանակն է, որ «ակտիվացումներ» ընթանան հյուսիսկովկասյան այլ հանրապետություններում, Վրաստանում, Ադրբեյջանում և անգամ՝ Հայաստանում:

Չպետք է բացառել, որ որոշակի զարգացումների արդյունքում «բեալանյան» կամ համարժեք այլ սցենարներ կրկնվեին (*կրկնվե՞ն*) նաև Հայաստանում: Ավելին, հարկ է ենթադրել, որ «ակտիվացումները» հենց Հյուսիսային Կովկասում (*ժամանակավորապե՞ս*) դուրս թողեցին Հայաստանը այդ գործընթացից:

Սակայն մյուս կողմից Հայաստանը խնդիրներ ունեցավ՝ կապված «Վերին Լարս» անցակետի շուրջ ստեղծված ճգնաժամի հետ, երբ, փաստորեն, անտեսվեցին մեր շահերը: Այսինքն՝ ամեն դեպքում մեր երկիրը զերծ չմնաց այդ գործընթացների բացասական հետևանքներից: Ի հավելումն, Իրաք հայկական ստորաբաժանում ուղարկելը, «Հազարամյակի մարտահրավերներ» ծրագրում ներգրավվելը (ընդհանուր առմամբ՝ Երևան-Վաշինգտոն հարաբերություններում նոր զարգացումները) նույնպես կարող են այստեղ «ակտիվացման» պատճառներ հանդիսանալ՝ հիմքում ունենալով կովկասյան տարածաշրջանում առկա աշխարհառազմավարական նպատակների և ընթացող աշխարհաքաղաքական շարժերի տրամաբանությունը:

Ամեն դեպքում, հարկ է նշել, որ գոյություն ունի սպառնալիք, թե առաջիկա ժամանակահատվածում Երևանը կարող է բախվել աշխարհաքաղաքական մարտահրավերների, որոնց արդյունքներից, թերևս, հանդիսանան ներքաղաքական լարվածությունը կամ ապակայունացումը, ինչպես նաև ֆինանսատնտեսական դժվարությունները:

Մեր կարծիքով, աշխարհաքաղաքական առումով Հայաստանի շահերից չի բխում Հարավային Կովկասում Ռուսաստանի հետագա թուլացումը¹ (կամ վերջնական հեռացումը), որը կարող բացասական ազդեցություն ունենալ ողջ տարածաշրջանի համար (ռազմաքաղաքական հավասարակշռության խախտում, ֆինանսատնտեսական հավանական կորուստներ): Ռուսաստանը մեզ համար կարևոր է թե՛ ռազմաքաղաքական², թե՛ տնտեսական առումներով: Հատկապես վերջին պարագայում հարկ է ընդգծել ռուսական շուկայի կարևորությունը հայրենի տնտեսության աճի համար:

Մյուս կողմից՝ Հայաստանի շահերից է բխում համագործակցությունը ԱՄՆ-ի և Եվրամիության հետ, ինչը լրացուցիչ հսկայական հնարավորություններից զատ³, կոչված է փոքրացնելու հավանական վտանգները (Արցախի հարցը, զարգացումները միջազգային կառույցներում և այլն):

¹ Մեր պարագայում նույնը վերաբերում է Իրանին:

² Չպետք է մոռանալ, որ Հայաստանն անդամակցում է Հավաքական անվտանգության պայմանագրի կազմակերպությանը և հանդիսանում է նրա հարավային (կովկասյան) թևի պատասխանատուն:

³ «Լրացուցիչ հնարավորությունների» մեջ նաև պետք է հասկանալ Հայաստանն արտաքին աշխարհի հետ կապող այլընտրանքային ճանապարհների խնդիրը: Օրինակ, հայ-թուրքական սահմանի վերաբացման հարցը, որը կարծես կրկին կարևոր դարձավ «Վերին Լարս» անցակետի փակումով:

Ընդհանրացնելով՝ *status quo*-ի ցանկացած արմատական փոփոխություն ի վիճակի է լուրջ խնդիրներ առաջացնել հարավկովկասյան կայունության համակարգում, որի առաջին նշանները այլևս առկա են: Այդ առումով, Հայաստանի համար կարևոր նշանակություն ունի ռուս-վրացական հարաբերությունների կարգավորումն, ինչը զգալիորեն կնպաստի լարվածության թուլացմանը Հարավային Կովկասում:

Այսինքն՝ *status quo*-ն կամ իրավիճակը, որը մոտ է *status quo*-ին, Հայաստանի համար ամենաձեռնտու տարբերակն է, ինչը թույլ կտա կարգավորել և ամրացնել հայրենի քաղաքական համակարգը և շարունակել առկա տնտեսական աճը՝ շեշտը դնելով, սակայն, որակական ձեռքբերումների վրա (վերարտադրվող և զարգացող տնտեսական համակարգ):

Ըստ ամենայնի, ընթացող գործընթացների համատեքստում առաջիկա ժամանակահատվածում Հայաստանի համար նոր կարևորություն են ձեռք բերելու իր անմիջական երկու հարևանները՝ Վրաստանն ու Իրանը: Հարաբերությունները Թեհրանի ու Թբիլիսիի հետ Երևանի համար դառնալու են ազգային անվտանգության կարևոր գործոններ: Հատկապես վերջինիս պարագայում հարկ է ընդգծել ծավալուն աշխատանքի այժմեականությունը:

Սարգիս Հարությունյան